

## MALAKAI gbouŋ

*Ki jiin Malakai gbouŋ na po*

Malakai yoo na ki soɔ Juda teeb na nyii Babilonn ki jenna, ki bia ŋamm maa Yen-jiantu ŋasaakak na ki gbenna, ŋaan ji be fara. Malakai din betib nan linba teen ki bi be fara na tee baa dint tarii biak, ki yêen bi ŋaapoob, ki bia ki teen Yennu bi bona piik ni yennkɔɔ na paake. Li-i tee ki bi nyik li yanbomm booru, Yennu saa teen piisin bi paaka. Malakai paake tee “N toonii.” U din dɔŋ pak toonii nba tan saa ŋamm Yennu sonu ki wun baar na poa.

<sup>1</sup> Mɔmaan nba ki Yennu din pak tur Malakai a wun bet Israel teebe na.

*Yennu nba loon Israel teeb biaŋinba*

<sup>2</sup> Yennu yeen u niib a, “Yoo kur n loonie.”

Ŋaan ki bi boi a, “A loont nlee?”

Ki Yennu jiin a, “Esɔɔ nan Jakɔb din tee naanɔɔke, ŋaan ki n mantik loon Jakɔb nan u yaaboona, <sup>3</sup> ŋaan ki loon Esɔɔ nan u yaaboona, ki biir kunkona doi nba ki Esɔɔ yen na, ki li dɔɔ yann, ki mɔboi gɔrin leŋ.”

<sup>4</sup> Li-i tee ki Esɔɔ yaaboona nba tee Edom teeb na yet a, “Ti doi nba ki bi bit na, ŋaan ti saa ŋamm maa doi maŋa,” Yennu saa jiin a, “Ŋaant ki bin ŋamm maa, ŋaan n bia saa bit doi maŋa. Niib sii yib a ‘Digbanbiuk,’ nan ‘Booru

nba ki Yennu wutoor kan ban maak bi paaki.’  
”

<sup>5</sup> Israel niib saa la linba na nan bi moŋ ninbina, ki saa yet a, “Yennu tee Yenjaanne, halii nan binba ki tee Israel teeb na boora.”

*Yennu nba yakii nan mannteeb biaŋinba*

<sup>6</sup> Yabint Yennu yet mannteeb na a, “Bik teen u baa baakir, ki daabir mun teen u chanbaa baakir. Mine tee i baa, ki bee ki i ki teenin baakiri? Mine tee i chanbaa, ki bee ki i ki teenin baakiri? I jakime, ŋaan bia boi a, ‘Ti jaka nlee?’ <sup>7</sup> Yaa jakin biaŋinbae na, i dia jeet nba ki mək nyoot ki teen piinii n maruŋ binbintir na paak, ŋaan bia boi a, ‘Ti yê t tura baakir nlee?’ N beerie, nan i koont n maruŋ binbintir na jakinte. <sup>8</sup> Yoo nba ki i baar nan bonkobuk nba tee jooŋ, koo baato, koo diaŋ, ki tan mann maruŋ ki turin, i got soo siara kpetir kaa leŋi-i? Fi-i jii li bonkob-booru ki tur a doo diaroo, u sii mək parpeenn a piinii maŋ paak, koo ki tura sommira-a?”

<sup>9</sup> Tɔn, yimm mannteeb, yabit ki yet Yennu ki wun tint ninbaauk. Yennu kan jiin i miaru maŋi, ki li sii tee i biite. <sup>10</sup> Yabint Yennu yet a, “N sunman ki i yenoe n bo loon n ŋasaakak na gana, ki lin goori ki i daa jokit muu nba ki mək nyoot n binbintir na paaki. N ki mək parpeenn i paaki. N kan gaar i piinii nba ki i baar nann ki turin na. <sup>11</sup> Niib kur nba be durinya na ni, laa nyii kpiŋ ki saa tuu kpinleek po, bi teenin baakir. Lokir kur po, bi jokit bonnunubit ki teenin, ki bia piinin maruŋ bona nba ŋan. Bi kura baakitin. <sup>12</sup> ŋaan yimm ŋarin ki teenin

baakir, kimaan i yeen a n maruᅇ binbintir na ki mək nyooᅇ, ki bia dia jeet nba ki i moᅇ ki loon na, ki mann maruᅇ li paak. <sup>13</sup> I tuu yet a, ‘Ti mantik bak nan linba na nba kura,’ ki ji yisimin. I baat nan nanyuk-bonkobit, koo bonkobdianii, koo bonkob-baatit ki li tee piinii ki teenin. I dukii a n saa gaar i piinii maᅇa-a? <sup>14</sup> Məᅇont be daansəə nba senn məsonn a wun tur min Yennu pejak nba ᅇan, ᅇaan ji tan lebit ki jii wunba mək daᅇ ki mann maruᅇ ki turin na paak. Kimaan n tee kpanbarjaanne, ki nibooru kur teenin baakir bonchiann.”

## 2

<sup>1</sup> Yabint Yennu bet mannteeb na a, “Sennu nba na tee i yare: <sup>2</sup> See ki i turin baakir, i binbeᅇ ni. Li-i tee ki i kan gbiint linba ki n yeen na, n saa sat məᅇonte i paak. N saa sat məᅇont bona nba ki i gaan ki li tee i sommir na paak. Barməonii, n poᅇ sat məᅇont li paaka, kimaan i ki sak n sennu na. <sup>3</sup> N saa dat i waas tuba, ki jii bonkobit nba ki i dia mann maruᅇ na pot ki pəᅇ i nunii po, ki bin ji-i saan lu-i tanpenn paak. <sup>4</sup> ᅇanne ki i saa bann nan min Yennu-e turi sennu maᅇ, ki n molor nba be nan Liifai teeb nba tee mannteeb na kan biiri.

<sup>5</sup> “N molor maᅇ ni, n turib manfoor nan binbenᅇaᅇ məsonn, ki linba ki n set turibe na, a bin turin baakir. Ki bi din chərimin ki baakitin yoo maᅇ. <sup>6</sup> Bi din want linba tooke; bi din ki want linba tee kpeta kaa. Bi din mək motaauk nanin, ki be yentinu binbeᅇ; bi din tuun linba took, ki bia sommit niib bonchiann ki bi nyi bi toonbiit ni. <sup>7</sup> Li tee mannteeb

toonne nan bii want niib ki bin bann Yennu fanu. Niib-ii saa bi boor kii tumii n loomm, kimaan ḡamme tee min Yabint Yennu toonii.

<sup>8</sup> “Ŋaan mótana, yimm mannteeb ji nyik sɔnu nba took nawa. Ki i wannu na ji te ki niib bonchiann tuun biit. I biir molor nba ki n daan lor nani nawa. <sup>9</sup> Li paake ki n saa te ki i Israel teleeb n yisimi, kimaan i ki sak n mɔbi, ki bia mɔk ningannii, yoo nba ki i tumii n niib na.”

*Ki jiin niib nba ki waa Yennu fanu na po*

<sup>10</sup> Ti kura ki tee baa yenɔkɔɔ waas kaa-a? Yennu kaa nan ti kur-ii? Ki bee ki ti ji nyik mɔsona nba ki ti daan senn nan leeb na dianu, ki bia yisin Yennu molor nba ki u daan lor nan ti yeejamm na? <sup>11</sup> Juda teeb yêť bi mɔsonn nba ki bi daan senn ki tur Yennu na dianuwa, ki tun bonbilankant, Jerusalem nan tij na kur po. Bi kɔɔn jiantu ḡasaakak nba Yennu loonir na jakinta, ki jab kɔɔn poob nba jiantir yenbis. <sup>12</sup> Yennu n nyinn daanɔ nba tuun linba na, timm Israel teeb ni, ki ji daa ban te ki u pukii ti po, yoo nba ki ti niib baat nan piinii ki teen Yabint Yennu na.

<sup>13</sup> Bonleer nba ki i tuume na: i tuu buie ki fabin, ki i ninnyuut tan puub Yennu maruḡ binbintir na paak, kimaan waa ji ki gaan i piinii nba ki i baat nann u boor na paak. <sup>14</sup> I boi a bee ki Yennu ji ki gaan i piinii maḡi. Li paak tee, u mi nan i sɔɔ ji ki dia molor nba ki u daan lor nan u ḡaapoo, yoo nba ki u kɔɔnɔ ki daa tee naasimɔ na. Poo maḡe tuu tee a sommitɔɔ, ḡaan ki a tan yêť ki ki dia molor na, nan faa daan lor Yennu tɔɔnn nan a saa dia a ḡaapoo maḡ fanu, ki kan nyi u poor bianjinba

na. <sup>15</sup> Yennu daan ki taan fin nan poo maŋ ki teeni gbananyenn, nan seek yennkoo kaa-a? Li paak tee bee? Li paak tee a yin mar waas nba tee barmonii Yentinnae. Li paak, ii mi ki i soo n nyik u molor nba ki u lor nan u ŋaapoo na. <sup>16</sup> Israel teeb Yomdaano Yennu yet a, “N ki loon pooyêtuk. Li-i tee ki i yeno tun li tonu bont ki tur u ŋaapoo, n wutoor tuu doe. Ii mi man ki i soo n biir molor nba ki u lor nan u ŋaapoo na.”

*Ki jiin buut daar nba per na po*

<sup>17</sup> I mantik ŋaan Yennu bak nan i pinpakita, ŋaan ki i bia boi a, “U bak nant nlee?” I yeen a, “Yabint Yennu dukii a toonbiit damm kur tee niŋamme, barmonii, u loomm,” koo ki boi a, “Yennu nba teen niib bi monii na be lia?”

### 3

<sup>1</sup> Ki Yabint Yennu na jiin a, “N saa tun n toomu ki wun ŋamm sonu na ki turin. Ton, ki Yennu nba ki i guu-u na saa baar yiama, u ŋasaakak na ni. Toomu nba ki i gorii u sonu po na saa baar ki tan wanni n molor na.”

<sup>2</sup> ŋaan ŋmee tan saa fit set, daar nba ki u saa baar na ni? ŋmee tan saa fit tinn, u-u dokit yoo nba? U tan sii tee nan cheeb nba mok paŋ nae, ki bia tee nan saauk muu nba ŋammit kut biaŋinba na. <sup>3</sup> U saa baar ki bu ti buut, nan baa tuu pur salimpeena muu ni ki ŋammir biaŋinba nae. Sakurtoo nba tuu ŋamm salimmona nan salimpeena biaŋinba na, nnae ki toomu maŋ saa ŋamm mannteeb ki bin ji fit baar nan piinii nba took ki tur Yennu. <sup>4</sup> Ki Juda nan Jerusalem teeb nba ji teen Yennu bi piinii nba na, u sii

mok parpeenn li paak, nan waa din tuu mok bianjinba na.

<sup>5</sup> Yabint Yennu yet a, “N saa baar i boor ki tan bu binba tee jabaabuura, nan bonchonchona, nan faak siara damm, nan binba ŋmaab bi toontunna bi paauk ni, nan binba fiar pakɔi nan kpeebii nan nigamm bona, nan binba kur ki teenin baakir na buut.”

*Ki jiin bona piik ni yennkɔɔ turu po*

<sup>6</sup> “Mine tee Yennu, n ki lebitir. Li paak, yimm Jakɔb yaaboona, i daa ki mantik boont kaa. <sup>7</sup> I tee nan i yeejamm nae. I nyik n wannu nawa, ki ji ki diari. Jenin n boor ni man, ki n sii be nani. Ŋaan i boie a, “Ti saa teen nlee ki jen a boori?” <sup>8</sup> Ki n boi-i maa, li ŋan ki nirɔ n ŋmab Yennu-u? Aaii. Li ki ŋani, ŋaan i ŋmaab min Yennu. Ki i boi a, “Ti ŋmaaba nlee?” I ŋmaabin i bona piik ni yennkɔɔ turu ni, nan i piinii ni. <sup>9</sup> Mɔtont be i kura paak, kimaan digbann na kur ŋmaabime. <sup>10</sup> Baat nan i bona piik kur ni yennkɔɔ, jiantu ŋasaakak na ni, ŋanne saa te ki jeet bonchiann be li ni. Bikintin ki la maa saa teen piisin i paak bianjinba. N saa loot yendɔurɔ tammɔi ki turi bonŋana booru booru, ki yin tan kɔŋ binbir boor. <sup>11</sup> N kan te ki bonfoi n biir i bonbuburit nan i jeet, ki i daan tiinii saa lon loona bonchiann. <sup>12</sup> Ki digbana kur niib saa yiini parpeenn damm, kimaan i tij na tan sii tee siaminba ŋan nan kɔɔnue.”

*Yennu mɔsonn nba jiin ninbatinu po*

<sup>13</sup> Yennu yet a, “I pak bonbiir bonchiann ki jiin n po. Ŋaan i bia tuu boie a, “Ti pak bee ki

jiin a po?’ <sup>14</sup> I yet a, ‘Yenweiu ki mɔk nyooti. Nyolante ki ti saa la, li-i tee ki ti tuun waa wann linba, koo li-i tee ki ti yiab a tin wann Yabint Yennu nan ti mɔk biit nan taa tun linba. <sup>15</sup> Ti laat nan karinbaandamme tee binba mɔk parpeenn. Ki toonbiit damme laat nyoot, ki bia dia bi toonbiit maŋ ki bikii Yennu, ŋaan ki siar ki biiribi.’ ”

<sup>16</sup> Ton, niib nba tee yentinna na pak nan bi leeb, ki Yennu gbiint baa yet linba. Binba tee yentinna ki teenɔ baakir na kur, bi sɔb bi sana gbouŋ nie, Yennu toonn. <sup>17</sup> Yabint Yennu yet a, “Ŋamme sii tee n niib. Buut daar, bi sii tee n mɔŋ mɔŋ yabe. Ki n saa timm ninbaauk, nan bibaa nba tuu mɔk ninbatinu u bik nba tuunɔ bianaŋinba na. <sup>18</sup> N niib saa ŋamm la linba saa tun ki tur binba tee popeendamm nan tondamm, li bɔkitu nba tee bianaŋinba, ki bia bann daanɔ nba tuun n toonn nan daanɔ nba ki tuun n toonn na bɔkitu.”

## 4

### *Ki jiin Yennu daar na baaru po*

<sup>1</sup> Yabint Yennu yet a, “Daar baate, ki karinbaandamm nan toonbiit damm na tan saa di muu nan kinkaka na. Li daar maŋ, bi saa di boonte, nan bi siara kan biari. <sup>2</sup> Ŋaan yimm nba sak n mɔb na ŋarin, n tinnu yiikoo na saa yent i paak nan yondoor yonkpana nae, ki turi laafia, ki yin la fat-n-mɔŋ, ki ji mɔk parpeenn nan baa tuu nyinn naabis naaloor ni ki bi mɔk parpeenn bianaŋinba na. <sup>3</sup> Mi-i tun linba na daar nba, i saa nyann tondamm nae, ki bi ji tee nan tanbiinii na, i taapant ni.

<sup>4</sup> “Ii tian n toontunno Moses sennii nan wannu nba ki n din turo, Sainai joor paak, a Israel teeb kur n sakir na.

<sup>5</sup> “N saa doŋ tun n sokinii Elaija i boor niewa, ki min Yennu daar nba tee dajaann, ki bia tee jaŋmaanii daar na n tan baar. <sup>6</sup> Sokinii maŋ saa te ki waas nan bibaanba n ɣamm taan kii mok dudukɗant. Nna-i kaa, see ki n baar ki biir i tiŋ maŋ.”



**Yennu Gbouŋ Mɔɔr**  
**Bimoba: Yennu Gbouŋ Mɔɔr Bible**

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Sep 2022 from source  
files dated 11 Jul 2022

00d89ba0-4677-52d9-9bc5-aa3d7c5c966d